

Ilitturidjutikhaq
Tuhaayakhaq – “Qitupat Tautuktuuyaqtanga”
Uqaqtangit Millie Kuliktana

Amigaittuni ukiuni ilihaivakpakhunga qablunaatut, Inuinnaqtun Inuktitullu ayurnaahiyuumiqtuq ilihaigiami hivulliqqaakkut uqauhikkut qatan’ngitigit angigliyuumirmata Qablunaatut uqainaliqhutiglu hivulliqpaanguqhuni. Tautuktuuyariyara takulugu tuhaalugu mihigimalirlugu Inuinnaqtun pitquhiptingnut naunaitkutaulirluni Inuinnainnut Nunavunmi.

Ilihimaliqhuta Inuinnaqtun annaumabkaqtauyukhaq ilipkaqtaanga ayurnaitqiyaaq ayuiqhariami uqauhinik tuhaanginarlugu atauhiinaq uqauhiq inirnikhaanit taapkuningalu uqqariktunit hulilukaarutauyuq uqauhiq. Imaa uqauhinik ayuiqhariami uqauhiriyat tiguqattarlugit uqariyauyut. Hivullivut uqauhiliuqpagaat Inuinnaqtun hulilukaarutivakhugu hanaqilukaaqhutik algangmingnut ubluqtamaat inuuhirmingni, tainikhaliuqhutik atuqpaktamingnik inuuhiqattiarnirmut, hulilukaarnikkut ihumanikkullu.

Ilihaihimmaarupta uqauhirmik atuqhimaittumik tainiit ayuiqhaqtavut inuuhiptingni tainiillu qanuriliurutauyut itqaumalimaitavut taimaalu tammaqtallianaqtut, kihimi aturlugit tainiit hulilukaarutigilugit ikayuutauyut ihumaptigut hulilukaarutiptigut itqaumanaqtat nanminiriliqhugu taapkua tainiit puigurunairlugu.

Ilaumatigilirlugit inirnikhaat uqqarikkullu qapuittunit qapiittuuyunut ikayuutauniaqtuq nukaqhiit inirnikhaallu piqatigiiliriangita, uqauhirmut pitquhirmut ilihaudjutigikhaariangani. Qapuitumit Iliharniq akiittumik ayuiqhaudjutigittaaqtauyuuq, aulapkadjuhia munarittiaqtauluni imaa qapiittut iliharvigiyangillu ikayuqtaulutik akiikhainut atuqtakhait ilihaudjutigiyakhait hanaqiqtiarlugit. Imaaliqaak Inirnikhaat uqaqpaktut tunin’nguqpaktaamingnik ilannaqaqpaliriangita inuuhirmingni, ayuirumayullu hulilukaqpalirlutik ayuiqharlutik qatan’ngutimingnut ilihaudjijyakhainik

Ikittugaluarluni imaa qulini ikaarnini havainirmi atauhirmi, hitamanut siksinnulluuniit tatqiqhiutini ukiuni pingaqhuni ilitturiyauhimaliqtaat ilihautigiyaugumi uqauhirmik ayuiqharumayunut, taimaa ikayuutauniaqtuq uqauhiq pitquhirlu aulagiangani taavungaraaluk. Tautuktuuyaqtara takulugu, tuhaalugu mihigilugulu Inuinnaqtun atuqtauyuuq naunaiqhijutaubluni pitquhiinut Inuinnait Nunavunmi. Ilagiigluhi qimaglugu Qablunaatitut, naalagluhi igyuarluhi ihumaliurluhilu hulilukaarluhilu Inuinnaqtun atuqhugu.